



KEMENTERIAN WILAYAH PERSEKUTUAN

Blok 2, Menara Seri Wilayah, Presint 2, 62100 Putrajaya

Tel: 03-8000 8000 Faks: 03-8889 7957

Laman web: www.kwp.gov.my

SIARAN MEDIA

UNTUK LIPUTAN MEDIA MASSA

PROGRAM INISIATIF MENSEJAHTERAKAN RAKYAT WP LABUAN DITERUSKAN

LABUAN, 28 April 2019 – Kementerian Wilayah Persekutuan meneruskan lagi program Inisiatif Mensejahterakan Rakyat WP Labuan dengan memperkenalkan program Seni Pembuatan Sabun kepada 200 orang dalam kalangan komuniti Labuan.

Program ini diadakan dengan kerjasama Perbadanan Labuan dan Yayasan Wilayah Persekutuan bertujuan mempelbagaikan lagi kemahiran dan ilmu pengetahuan kepada komuniti Labuan untuk menghasilkan produk kegunaan sendiri di samping dapat menceburi bidang keusahawanan. Seni pembuatan sabun ini dipilih kerana proses penghasilannya yang mudah berasaskan bahan organik dan herba serta boleh dihasilkan dari rumah. Keperluan peralatan juga minimal dan tidak menggunakan bahan kimia yang memudaratkan kulit dan kesihatan tetapi mampu untuk menjana pendapatan yang lumayan.

Memandangkan Kementerian Wilayah Persekutuan dan Perbadanan Labuan sedang berusaha mengukuhkan sektor pelancongan untuk dijadikan sumber ekonomi utama WP Labuan, produk seperti sabun organik dan produk jahitan *quilt* ini boleh dijadikan sebagai produk buah tangan (*local gift*) dari Labuan untuk para pelancong. Motif (*design*) sabun yang dibuat juga boleh memaparkan ukiran imej Labuan supaya lebih menarik. Oleh itu, kementerian akan melatih komuniti Labuan yang berminat untuk menghasilkan produk

sabun *homemade* ini untuk diketengahkan sebagai produk pelancongan Labuan secara besar-besaran. Pihak kerajaan terus memantau pelaksanaan program ini agar mencapai matlamat seperti yang diharapkan.

Oleh itu, Kementerian Wilayah Persekutuan, Perbadanan Labuan dan Yayasan Wilayah Persekutuan menyeru agar lebih ramai warga Labuan khususnya golongan suri rumah dan individu yang masih mencari pekerjaan untuk merebut peluang dengan menyertai mana-mana program kemahiran keusahawanan yang dianjurkan oleh mana-mana agensi kerajaan seperti ini sebagai pemangkin kepada penambahan pendapatan sendiri dan keluarga. Komuniti WP Labuan khususnya harus bijak dalam merencanakan peluang yang ada meskipun sekadar perniagaan kecil-kecilan.

Disediakan oleh :

Bahagian Komunikasi Korporat

Kementerian Wilayah Persekutuan

28 April 2019